

Die moet en moenies van christenskap!

Maandag 11 Oktober 2021

Fil 2:12-18

Christenskap het eintlik nie moet en moenies nie. Dit is nie 'n geloof van wat moet ons doen en wat ons nie moet doen nie. Dit is die enigste geloof waar alles uit genade is en ons totaal en al uit dankbaarheid tot eer van God wil leef. Dit is die enigste ware geloof! Want ons aanbid die enigste Lewende, Drie-Enige Verbondsgod, wat altyd dieselfde is, van ewigheid tot ewigheid.

Daarom dat Paulus as 'n feit stel hoe die gemeente van Filippie geleef het toe hy, Paulus, by hulle was en hoe hulle hierdie leefwyse moet voortsit.

Ons gaan vir die volgende drie oordenkings handel oor hierdie Skrifgedeelte:

Eerstens: Daar is 'n doel om te bereik. Fil 2:12, 14-16

Tweedens: Daar is die God wat ons daartoe in staat stel. Fil 2:13

Derdens: Daar is 'n belofte van wat die einde gaan wees. Fil 2:16-18

Eerstens: **Daar is 'n doel om te bereik.** Fil 2:12, 14-16

Fil 2:12 '53 "Daarom, my geliefdes, soos julle altyd gehoorsaam gewees het, nie in my teenwoordigheid alleen nie, maar baie meer nou in my afwesigheid, werk julle eie heil uit met vrees en bewing;"

Fil 2:12 '83 "My geliefdes, julle was altyd gehoorsaam wanneer ek by julle was. Des te meer moet julle gehoorsaam wees nou dat ek nie daar is nie. **Julle moet julle met eerbied en ontsag daarop toelê om as verlost mense te lewe,...**"

"Werk julle eie heil uit met vrees en bewing!" '53

"Julle moet julle met eerbied en ontsag daarop toelê om as verlost mense te lewe,..." '83

Hier bedoel Paulus nie, dat ons moet werk vir ons verlossing nie. Trouens as ons Fil 1:1 lees, lees ons dat die gemeente van Filippie alreeds aan God behoort deur Jesus Christus. So hulle hoef nie iets te doen om aan God te behoort nie.

Trouens geliefdes, dit is hoe dit is met elkeen wat in Jesus Christus glo. **Joh 3:16** "God het die wêrelд so lief gehad dat Hy sy enigste Seun gegee het, sodat dié wat in Hom glo, nie verlore sal gaan nie maar die ewige lewe sal hê."

Dit grikse woord vir "werk jou heil uit" (katergazomai) beteken dat jy soos wat 'n goudmyn ontsettende potensiaal en rykdom in die aarde het, so is ons as christene, ons het 'n ontsettende rykdom in ons vanweë God se genade in en deur Jesus Christus en die werking van die Heilige Gees. Daarom moet ons soos 'n myner, diep delf in ons lewens om die beste uit te haal sodat ons geloof wat kosbaarder is as goud, tot eer van God kan leef. God moet al die eer kry deur Jesus Christus.

Ons moet so lewe dat ons soos goud is wat blink tot eer van God. Ons kan dit net bereik deur in gehoorsaamheid aan God te leef. Die vraag is: "Hoe kan ons dit bereik?" Daarna gaan ons DV komende Donderdag kyk.

Intussen, leef in dankbaarheid en gehoorsaamheid aan God as ligdraers vir die evangelie.

Ds Gerrit Kruger: Gereformeerde Kerk Centurion: Tel 082 964 5595: gskruger1@gmail.com